

UDHËZIM

Nr. 165, datë 16.3.2007

PËR PËRCAKTIMIN E SKEMËS SË DUHUR PËR SHTYPJEN E PËRQENDRUAR TË BILETAVE, SHPËRNDARJEN DHE KONTROLLIN E HEDHJES SË TYRE NË PËRDORIM

Në mbështetje të nenit 102 pika 4 të Kushtetutës së Republikës së Shqipërisë, nenit 6 pika 5 të ligjit nr.8701, datë 1.12.2000 "Për lojërat e fatit, kazinotë dhe hipodromet", të ndryshuar, si dhe pikës 2, germa "b" dhe "c", të vendimit të Këshillit të Ministrave nr.712, datë 18.12.2006 "Për krijimin, përbërjen, kompetencat dhe mënyrën e funksionimit të Komitetit ad-hoc të lojërave të fatit, kazinove dhe hipodromeve", Ministri i Ekonomisë, Tregtisë dhe Energjetikës

UDHËZON:

1. Shtypja e biletave të lojërave të fatit kryhet nga vetë shoqëritë, që ushtrojnë veprimtarinë në fushën e lojërave të fatit, në përputhje me ligjin dhe aktet nënligjore në fuqi.
2. Ministri përgjegjës për ekonominë, me propozim të Komitetit të Lojërave të Fatit, miraton çdo biletë të re, që hidhet në qarkullim nga organizatori i lojërave të fatit në kategoritë e lojërave aritmetike, lotarive dhe lojërave të fatit sportive. Për këtë qëllim, organizatori paraqet pranë Ministrisë së Ekonomisë, Tregtisë dhe Energjetikës dokumentacionin e mëposhtëm:
 - a) Kërkesën për miratim të biletës, shoqëruar me modelin e biletës së propozuar nga organizatori;
 - b) Kontratën e lidhur me prodhuesin e biletës;
 - c) Detaje teknike të lojës dhe biletës;
 - d) Planbiznesin e zhvillimit të lojës (vetëm për shoqëritë e licencuara në kategorinë e lojërave "Lotari").
3. Bileta e propozuar nga organizatori duhet të përmbajë elementet si më poshtë:
 - a) Emrin e shoqërisë;
 - b) Të përmbajë nënshkrimin e "Miratuar nga Ministria e Ekonomisë, Tregtisë dhe Energjetikës";
 - c) Çmimi i biletës në lekë (përfshijë biletat e lojërave sportive të fatit), ku të përfshihet TVSH-ja;
 - d) Numri serial i biletës (për biletat e lojës së fatit "bingo" duhet të jetë gjithmonë progresiv);
 - e) Elementi i sigurisë së biletës;
 - f) Rregullorja e lojës me çmimet përkatëse për fituesin (për biletat e lotarisë së çastit).
4. Biletat shtypen në mënyrë të përqendruar, në një shtypshkronjë të akredituar brenda ose jashtë vendit.
5. Në kontratën me shtypshkronjën do të përcaktohet data e fillimit të shtypjes së biletave, sasia në copë e biletave, numri serial i biletave, çmimi i shtypjes së biletave, specifikimet teknike të biletave dhe vendosja e elementeve të sigurisë në biletë.
6. Organizatori depoziton pranë Drejtorisë së Licencave dhe Menaxhimit të Kontratave në METE, përpara hedhjes në qarkullim të biletës për kategorinë e lojës "lotari me fitim në çast", CD me kodet e sigurisë dhe çmimet fituese të biletave si të prodhuara nga shtypshkronja, me të cilën organizatori ka lidhur kontratën. Kjo CD hapet vetëm në përfundim të lojës dhe në prani të organizatorit.
7. Organizatori është i detyruar të depozitojë në METE regjistrin e shpërndarjes së biletave, sipas sallave apo pikave të shitjes në të gjithë territorin e vendit përpara hedhjes në qarkullim të biletës dhe të

njoftojë në vazhdimësi për çdo parti të re furnizimi në këto pika shitjeje.

8. Organizatori i lotarisë së çastit/me shorte është i detyruar të publikojë në të gjitha pikat e shitjes së biletave:

a) serinë e plotë të biletave të hedhura në qarkullim në të gjithë territorin e vendit;

b) rregulloren e lojës.

9. METE publikon në faqen e saj të internetit çdo biletë në kategorinë e lojërave të fatit "lotari", të miratuar nga Ministri përgjegjës për ekonominë dhe serinë e numrave të hedhur në qarkullim.

10. Organizatori i lojës njofton METE në çdo tre muaj mbi xhiron e realizuar nga shoqëria, bazuar mbi shitjen e biletave; sasinë e shitur të biletave dhe çmimet fituese, si dhe derdhjen e detyrimeve tatimore, sipas ligjit.

11. Mbyllja e lojës dhe asgjësimi i biletave bëhet vetëm me miratim të Ministrit përgjegjës për ekonominë.

Ky udhëzim hyn në fuqi menjëherë dhe botohet në Fletoren Zyrtare.

MINISTRI I EKONOMISË, TREGTISË

DHE ENERGJETIKËS

Genc Ruli